

CHERITA

KANAK

KANAK

II



oleh **O.S. Arshad**

Penerbit: SINARAN BROS.

ANAK DERHAKA

Ada suatu tempat bernama Batu Sangkar, dudok-nya di-daerah Minangkabau - Indonesia. Di-sana terdapat sa-buah mata ayer, yang sangat menarek perhatian orang ramai dari semenjak dahulu. Ayer-nya panas dan sentiasa menggelegak. Kelihatan dalam ayer itu berangkai-rangkai lumut panjang saperti rambut perempuan.

Maka tersebut-lah pada sa-buah kampung yang berhampiran dengan Batu Sangkar itu. Di-sana ada diam sa-orang janda dengan sa-orang anak perempuan-nya bernama Kamariah.

Rupa Kamariah ini sangat chantek, tidak ada tolok banding-nya di-seluruh daerah. Badan-nya tinggi lampai, kulit-nya berwarna kekuningan langsung, dan rambut-nya hitam mengkilat, serta panjang lebat.

Orang-orang di-daerah negeri itu hairan benar melihat gadis itu yang berlainan daripada perempuan-perempuan lain.

Ibu Kamariah sangat bermegah mempunyai anak yang demikian baik paras-nya itu. Anak gadis-nya ini di-manja-manjakan dan dipuji-puji sepanjang hari. Sadikit pun tidak diberi bekerja, baik pun di-dalam rumah apa-tah lagi ka-sawah ladang. Kamariah di-biarkan bersenang-senang sahaja. Di-belikan-nya bermacam-macam pakaian yang bagus-bagus. Kerja Kamariah tidak ada lain, melainkan sentiasa bersolek dan menukar-nukar pakaian sepanjang hari.

Dengan demikian Kamariah telah menjadi sa-orang gadis yang manja dan sombong, apa-tah lagi pada diri-nya sedia tersemat perangai atau sifat tinggi hati dan chongkak.

Orang-orang kampong di-sekeliling rumah Kamariah agak chemas melihat keadaan gadis itu, apa-tah lagi kerana melihat ibu-nya itu sa-orang tani yang sederhana sahaja.

Pada satu hari Kamariah dan ibu-nya berhajat hendak berjalan-jalan ka-sabuah kampong lain yang ma'mor dan ternama. Di-kampong itu sangat banyak rumah-rumah orang yang indah dan sawah-sawah ladang yang luas.

Maka Kamariah pun bersiap-lah, bersolek dan berhias, hingga ta' ubah rupa-nya nampak seperti anak sa-orang "orang kaya".

Mereka berdua beranak itu berangkat berjalan dari rumah-nya pada pagi hari, supaya sebelum waktu dzohor mereka telah sampai balek ka-rumah. Waktu akan berangkat, Kamariah telah berkata kepada ibu-nya, "Aku berjalan di-hadapan, ibu hendak-lah di-belakang-belakang aku sahaja. Jangan berdekatan sangat ibu dengan aku, supaya orang tidak tahu bahawa engkau ibu-ku!"

Ibu Kamariah merasa agak hairan mendengar perkataan Kamariah, akan tetapi perkataan ini tidak-lah sangat di-ambil berat oleh si-ibu, kerana dia sudah biasa mendengar dan menerima perkataan-perkataan yang sombong dan tajam dari mulut anak-nya.

Maka berjalan-lah mereka melalui sawah ladang, menyeberangi sungai dan gelong ayer. Sepanjang perjalanan Kamariah dan ibu-nya ta' berkata-kata. Kamariah melenggang dan mengayun-ngayun tangan-nya dengan sombong dan megah. Sedangkan ibu-nya yang berpakaian burok itu berjalan jauh tinggal di-belakang.

Beberapa lama mereka berjalan itu, maka sampai-lah mereka pada sa-buah kampung yang di-tujui itu. Baharu sahaja masok ka-lorong tersebut, orang-orang telah berlari berkerumun melihat gadis yang chantek itu. Sakalian orang-orang hairan menyaksikan kechantekekan-nya. Sa-tengah ada orang berkata, "Anak raja-kah dia ini!?" Dan ada pula sa-tengah orang yang berkata, "Harus bidadari yang turun dari langit?" Demikian-lah ramai orang berbisek-bisek dan berchakap-chakap sama sendiri waktu itu.

Sampai sahaja di-hadapan Balai A'dat yang besar serta di-hiasi dengan ukiran-ukiran yang indah dan bertulis dengan ayer emas, maka Kamariah dan ibu-nya pun di-jemput oleh beberapa orang perempuan supaya singgah di-Balai A'dat itu.

"Silakan singgah dahulu ka-balai kami, ayohai tuan puteri!", kata mereka yang ramai-ramai tadi.

Kamariah memang ingin hendak masok ka-dalam balai yang amat indah itu. Maka sahut-nya, "Ya, baik-lah, aku sangat penat dari perjalanan-ku yang jauh ini."



Maka dia pun menerima-lah panggilan dan jemputan singgah itu. Waktu mereka akan masuk ka-dalam halaman yang berpagar pokok puding emas itu, salah sa-orang. antara mereka berkata: "Bawa-lah masuk perempuan tua kawan tuan puteri itu bersama!"

Maka jawab Kamariah, "Ah, biar-lah dia dudok menunggu di-luar dekat pagar ini. Dia ia-lah budak belian (hamba) ayah-ku."

Memanchar peloh-peloh kecil ibu Kamariah, bila mendengar perkataan yang menusuk jantung-nya itu, akan tetapi dia diam sahaja, menahan sabar hati-nya yang telah geram itu, sambil berkata dengan lemah, "Ya, bair-lah aku dudok di-sini melepaskan penat."

Kamariah bersama-sama orang itu pun masuk-lah ka-dalam Balai A'dat itu. Tikar pandan yang putih melepak pun di-bentangkan orang, sedangkan hidangan makanan di-siapkan untok gadis ini, kerana pada sangka mereka gadis itu ia-lah sa-orang anak raja, yang telah tersesat ka-kampong itu. Kamariah sangat-lah di-hormat dan di-muliakan.

Sesudah santapan dan minuman tersedia,

maka berkata-lah sa-orang daripada mereka yang dudok: "Hantarkan-lah ayer dan makanan kepada perempuan tua yang ada di-luar itu."

Maka dengan tiba-tiba Kamariah menjawab: "Beri sahaja-lah ayer mentah sa-tempurong. Di-rumah pun dia tidak pernah di-beri makan minum di-dalam pinggan dan chawan."

Oleh kerana hari telah hampir masok waktu dzohor, Kamariah pun bermohon hendak pulang. Atas permintaan orang-orang di-situ, Kamariah berjanji akan datang lagi.

Orang-orang turut menghantar Kamariah kajalan besar (raya).

Ibu-nya masih juga dudok menunggu di-tengah panas yang terik, hingga badan-nya basah kuyup dengan peloh.

"Ayoh, iringkan-lah aku pulang," kata Kamariah dengan sombong-nya kepada si-ibu itu. Maka orang tua itu pun bangun, lalu di-iringkan anak-nya yang derhaka itu. Mereka berjalan menuju ka-kampong halaman sendiri. Akan tetapi masa itu udara sangat panas, kerana matahari telah tinggi melangit.

Dalam perjalanan itu maka sampai-lah mereka pada sa-buah mata ayer. Ayer-nya berwarna biru dan kelihatan sangat sejok.

Tiba-tiba Kamariah berhenti dan berpaling ka-belakang sambil berkata: "Ibu, aku sangat panas, biar-lah aku mandi di-mata ayer ini dahulu."

"Baik-lah, buat-lah apa kehendak-mu," jawab ibu-nya. Gadis itu membuka pakaian dan perhiasan-nya, kemudian dia turun masuk ka-dalam ayer. Rambut-nya yang panjang itu terapong-apong da-muka ayer.

Dengan sekonyong-konyong, ibu-nya yang dudok di-tepi mata ayer itu, berdiri dan melihat ka-atas, lalu berkata sambil menunjok-nunjuk kepada Kamariah: "Hai kamu anak derhaka! Jika perkataan sa-orang ibu di-dengarkan oleh bumi, langit dan matahari, maka masalah engkau di-rebus dalam ayer ini."

Sebentar itu juga ayer yang kelihatan biru tadi, telah beransor tukar menjadi warna kekuningan.

"Ibu, tolong!" kata Kamariah sambil ba-

ngun hendak lari keluar. Akan tetepi rambutnya yang panjang itu telah terkait ka-ranting kayu mati yang ada di-tepi mata ayer itu. Beberapa kali di-chuba-nya bangun ta' dapat, dia terpelanting ka-dalam ayer itu kembali.

Ayer itu mulai menggelegak saperti ayer yang baharu di-masak. Kamariah menjerit-jerit kesakitan, kerana seluroh badan-nya mulai lechor.

Ibu yang selama ini sangat kaseh akan anak-nya, sekarang telah bertukar menjadi seteru yang kejam. Ia berdiri di-tepi mata ayer itu sambil berkata: "Aku bukan ibu-mu aku budak belian. Ta' dapat aku menolong engkau, kerana aku budak yang ta' berdaya sahaja."

Ayer itu makin lama makin menggelegak dan bertambah panas. Keluar asap bergumpalgumpal.

Kamariah menjerit dan memek dengan sekuat-kuat hati-nya: "Ibu, ibu! Tolong, tolonglah aku. Ta' tertahan panas-nya ini!"

Ibu-nya ta' bergerak sadikit pun. Badan Kamariah mulai lechor dan masak rupa-nya. Sa-bentar kelihatan kepala bercheri dari badan-

nya. Walau pun demikian terdengar lagi suaranya berbunyi sayup-sayup: "Ibu, ampun, ibu tolong!"

Waktu itu baharu-lah ibu Kamariah bergerak, dan sedar akan diri-nya. Pada sa'at itu timbul-lah kembali rasa kasehan kapada anaknya. Si-ibu terus melompat ka-dalam ayer yang sedang menggelegak itu.

"Biar-lah kita mati bersama-sama", kata ibu Kamariah bagi kali yang pengabisan

Hingga sekarang mata ayer itu masih menggelegak dan berasap terus. Tampak-lah di-dalam-nya lumut-lumut panjang berangkai-rangkai seperti rambut perempuan tergerbang.

Dari mulut ka-mulut tersiar-lah riwayat mata ayer ini, yang boleh menjadi satu pelajaran kapada anak-anak muda.

SEKIAN-LAIL.



BUDAK DENGAN ULAR

Pada suatu hari dalam musim sejok di-England, telah berlaku suatu kejadian yang boleh memberi pelajaran kepada anak-anak.

Hawa pada masa itu sangat redup dan sejok sa-olah-olah hendak turun hujan.

Sa-orang kanak-kanak lelaki sedang berjalan pulang ka-rumah-nya dari sekolah. Oleh kerana udara sa-kaliling sangat sejok maka budak lelaki itu berjalan-lah dengan agak pantas sedikit. Dalam perjalanannya itu sekonyong-konyong ia telah berjumpa dengan sa-ekor ular yang telah kaku kesejukan, sedang terbaring di-tengah-tengah jalan, dan harus hampir-hampir mati.

Kelihatan ular itu sangat chantek barek-barek warna kulit-nya. Oleh budak itu di-ambil-nya sa-puntong kayu dan di-sodok-nya akan ular itu serta di-bawa-nya pulang ka-rumah-nya.

Sa-telah sampai, ia pun terus pergi ka-
ungguan api (tempat berdiang bila musim sejok)
yang telah sedia ada di-nyalakan dalam rumah-
nya. Lalu di-angkat-nya ular tadi dan di-diang-
kai-nya di-tepi api yang sedang marak itu. Sa-
bentar kelibatan-lah ular itu bergerak perlahan-
lahan menjadi segar dan kuat sa-mula.

Kemudian dengan tiba-tiba kepala ular
itu pun mencondok bersedia hendak mematok bu-
dak itu. Bila terlihat demikian maka budak itu
pun sangat-lah ketakutan, lalu di-lepaskan-nya
ular itu. Dan ia lari berkeliling di-dalam ru-
mah-nya, ular itu terus menghambat dia. Ta'
tahu macham mana ikhtiar yang hendak di-buat-
nya, lalu ia lari ka-luar rumah sambil menjerit-
jerit minta' tolong.

Budak itu lari berkeliling di-halaman ru-
mah-nya, ular itu maseh jua mengejar-nya.
Sa-hingga lelah-lah (penat) budak itu berlari-lari,
untuk melepaskan diri-nya dari ular itu, tetapi
tiada dapat.

Mujor-lah bapa budak itu ada di-rumah,
ia sedang membelah kayu api di-dalam sa-buah
bangsal kuda di-belakang rumah-nya. Bila ia
mendengar suara jeritan anak-nya meminta'



tolong, maka ia pun datang, di-lihat-nya sa-ekor ular bisa sedang mengejar anak-nya. Dengan tidak lengah lagi lalu di-angkat-nya kapak yang telah pun sedia ada di-tangan-nya dan di-tetak-nya kepala ular itu, serta di-pijak-pijak-kan-nya dengan kasut-nya. Ular itu pun mati-lah.

Kemudian budak itu menguchapkan ber-banyak-banyak terima kaseh kapada bapa-nya dan ia mencheritakan kapada bapa-nya bagai-mana mula-nya berlaku kejadian itu daripada awal hingga sa'at ia menjerit minta' tolong.

Maka kata bapa-nya: "Wahai anak-ku, hendak-lah kamu jauhi daripada orang yang, jahat! Dan jangan-lah kamu berbuat baik pada orang yang bukan layak-nya. Orang yang jahat itu sentiasa menchari jalan dan ikhtiar supaya kita alfa sahaja, untok menjatoh dan memberi binchana kapada kita. Hendak-lah engkau beringat-ingat hai anak-ku!"

BATU JULANG

(SITA IJAH)

Ada dua orang miskin laki isteri. Mereka ada mempunyai dua orang anak yang maseh kanak-kanak lagi. Kedua-dua anak itu kurus-kurus sahaja, sa-orang laki-laki dan sa-orang perempuan.

Mereka itu miskin benar, kadang-kadang dapat makan dan kadang-kadang tidak. Rumah mereka sa-buah pondok burok yang sudah bochor atap-nya.

Kedua-dua anak itu tidak pernah mendapat makanan yang cukup, jauh sa-kali daripada benda-benda makanan yang mengandongi zat-zat. Bila mereka mendapat sa-suatu makanan berebut-rebut-lah kedua beradek itu makan dengan nafsu yang lahap seperti anak burung yang tania.

Suatu pagi ibu mereka memasak bubor nasi. Anak-nya yang laki-laki sudah lama duduk menantikan bubor itu masak. Terasa di-

lidah-nya akan makanan itu. 'Ta' berapa lama bubor itu pun masak, lalu di-angkat oleh ibu-nya dan di-berikan-nya kepada anak laki-laki-nya sa-piring. Maka kata ibu-nya: "Makan-lah, ini untok-mu, tetapi jangan engkau bangunkan adek-mu, kerana aku membuat sedikit sahaja, yang tinggal ini untok bapa-mu."

Sabentar sahaja bubor yang di-makan oleh anak laki-laki itu pun habis-lah. Maka teringat-lah ia akan adek-nya yang belum makan apa-apa lagi dari semenjak kemarin. Ia sangat kasehan kepada adek-nya itu, apa-tah lagi melihat adek-nya yang sedang tidor nyenyak. Lalu di-gerakkan badan adek-nya itu sedikit, adek-nya pun terjaga dan di-bisek ka-telinga adak-nya, yang ibu ada membuat bubor nasi. Adek-nya segera bangun dan pergi ka-dapor hendak mendapatkan ibu-nya meminta' bubor itu. Akan tetapi ibu-nya sudah pergi kepada bapa mereka di-hutan bagi menolong menchari kayu api untok di-jualkan.

Kedua-dua anak itu pun menchari-lah bubor yang di-simpan oleh ibu-nya tadi. Telah berjumpa, oleh abang di-berikan-nya kepada adek-nya. Dengan tidak lengah si-adek pun

makan-lah bubor itu sa-hingga habis. Oleh sebab perut-nya sangat lapar, maka bubor itu tiada-lah bersisa lagi.

Kelihatan rasa suka dan senang benar anak-anak itu, sebab perut masing-masing sudah kenvang. Kemudian kedua-dua beradek itu turun bermain-main di-halaman rumah.

Matahari pun beransor terek dan rembang. Burong-burong ta' berterbangan lagi, kelihatan mereka hinggap, berhenti lelah pada cabang dan ranting-ranting kayu serta melindungkan diri di-bawah rimbunan daun-daun kayu daripada terkena emanaya panas yang terek itu.

Di-hujung kampong sana nampak-lah orang miskin dua laki isteri itu berjalan pulang menuju ka-pondok-nya dengan leteh, lapar dan dahaga.

Sa-telah sampai ka-pondok-nya: oleh si-isteri terus naik ka-pondok hendak mengambil bubor yang di-simpan-nya tadi. Tetapi, alangkah kechewa hati-nya, tatkala di-dapati bubor itu ta' ada lagi. Sudah habis di-makan oleh kedua anak-anak-nya. Maka naik-lah amarah pe-

rempuan itu. Dengan perasaan yang amat kesal, lalu di-kehabarkan kepada laki-nya: yang bubor itu telah habis di-makan oleh anak-anak-nya.

Mendengar perkataan itu si-bapa pun dengan tidak berfikir panjang lagi, apa-tah amarah-nya pun naik memuchak tinggi, lalu di-pukul-nya anak-anak-nya itu dengan rutan, hingga hanchor rotan-rotan itu. Habis rotan di-ambil-nya pula kayu, lepas sa-ikat, sa-ikat.

Kedua-dua anak kecil itu meraong-raong kesakitan sambil meminta'-minta' ampun: "Sudah-lah! Sudah-lah! Tolong-lah bu, nak ta' kan buat lagi. Adoh bu, adoh pak; ampun-lah, ampun-lah pak. Jangan-lah pukul lagi pak . . . bu . . . ! Dah berdarah badan-ku bekas rotan bu! Pak, nak ta' kan makan lagi bubor bu. Pak, sudah-lah! ampuni-lah nak, bu!"

Kanak-kanak itu masih jua mcmekek kesakitan. Tetapi kedua orang tua laki isteri itu tidak juga mahu mendengar ratap tangis anak-anak-nya.

Agak-nya sudah di-masoki oleh shaitan iblis, ta' di-endah-nya, anak-anak-nya itu terus jua di-pukuli. Hingga kedua-dua anak-nya itu

pengsan, baharu-lah mereka berhenti memukul. Agak-nya baharu mereka puas hati.

Lalu mereka naik ka-pondok dan tinggal-lah kedua-dua anak itu di-tengah halaman dalam keadaan parah kesakitan.

Sa-telah beberapa lama, maka sedar-lah kedua kanak-kanak itu dari pengsan. Masing-masing merasai badan-nya sakit lebam-lebam dan bengkak, serta pechah-pechah melecher merah kena rotan.

Maka merangkak-lah si-abang itu mendapatkan adek-nya. Di-pangku-nya adek-nya itu seria di-chium-nya, kerana sangat sedeh melihat adek-nya terjadi demikian. Dengan tangisan yang tersedu-sedu ia berkata kepada adek-nya: "Dek, ka-mana-lah kita na' pergi, dek! Kita ta' di-sayang oleh ibu bapa kita lagi. Mari-lah kita pergi ka-atas Batu Jenjulang di-sana dek . . .", sambil ia berkata itu ayer mata-nya meleleh keluar ta' terhingga lagi, sampai berchuchoran jatuh ka-atas muka adek-nya yang sedang di-pangkuan-nya itu.

Kemudian bangun-lah ia mendukung adek-nya itu dan berjalan tertateh-tateh menuju

kapada Batu Jenjulang yang terletak di-bela-kang pondok mereka. Sampai di-situ kedua-dua beradek itu pun naik-lah dudok di-atas Batu Jenjulang yang lebar itu.

Hari sudah senjakala dan beransor malam. Hendak naik ka-atas pondok; kedua kanak-kanak itu takut pula kapada ibu bapa mereka, kalau-kalau di-pukul-nya lagi. Tinggal di-luar pondak pun takut juga.

Dalam mereka sedu sedan berfikir-fikir itu, tiba-tiba muncul-lah cahaya bulan di-balek bukit sana. Tetapi cahaya bulan yang gembilang itu tidak dapat menggirangkan hati ke-dua anak-anak itu.

Sambil menangis itu, dengan perasaan yang sayu pilu meratap-lah mereka, kata-nya:

Julang, julang Batu Jenjulang,
Julangkan kami ka-langit luas,
Ibu dan bapa' sudah berang:
Kerana makan bubor perawas.

Sudah habis rotan sa-kerat,
Sudah habis kayu sa-ikat;
Pemukuli kami anak melarat."

Di-ulang-nya kata-kata itu berkali-kali dengan perasaan yang sedeh dan berchuchoran ayer mata.

Dengan penoh kevakinan di-ulang-nya lagi nyanyian itu, dan dengan penoh harapan meminta' supaya batu itu bergerak ka-atas:

“Julang, julang Batu Jenjulang,
Julangkan kami ka-langit luas,
Ibu dan bapa sudah berang;
Kerana memakan bubor perawas.

Sekonyong-konyong batu itu pun bergerak naik sādikit, demi sādikit. Maka berhentilah mereka tiada meratap lagi. Batu itu pun merapak bunyi sa-olah-olah mengaku akan permintaan kanak-kanak itu.

Makin lama makin tinggi-lah batu itu melayang ka-angkasa, dan terdengar-lah suara kedua kanak-kanak itu sayun-sayun ka-bawah mengulangkan kata-kata tadi supaya batu itu sa-makin tinggi.

Kedua orang tua mereka yang dari tadinya tiada menghirau akan anak-anak-nya lagi, sekarang /sa-telah mendengar suara anak-anak-



nya sudah jauh dan sayup-sayup, baharu-lah sedar dan terus melompat terjun ka-tanah dengan chemas. Tetapi, sayang! Sudah terlambat, anak-anak-nya tidak ada lagi di-situ, telah jauh melayang ka-atas awangan. Suara-nya sahaja yang maseh terdengar berhiba-hiba melagukan kata-kata tadi.

Orang tua laki isteri itu baharu-lah merasa insaf akan kesalahan masing-masing, sekarang timbul-lah pilu dan kaseh sayang kapada anak-anak-nya. Teringat akan untong dan nasib anak-anak yang malang melarat itu.

Oleh ta' tertahan hati si-ibu, lalu berte-riak meraung-raung memanggil anak-anak-nya: "Wahai anak-ku, buah iantong hati ibu, turun-lah ka-bawah nak . . . ! Ibu dan bapa ta' akan marah, dan ta' akan pukul lagi nak !"

Sama ada di-dengar atau tidak-nya suara ibu mereka itu ta' dapat-lah di-tetapkan. Cuma suara hiba dan ratap tangis anak-anak itu sahaja yang maseh kedengaran:

"Julang, Julang Batu Jenjulang,
Julangkan kami ka-langit luas,
Ibu dan bapa sudah berang;
Kerana memakan bubor perawas.

Sudah habis rotan sa-kerat,
Sudah habis kayu sa-ikat;
Pemukuli kami anak melarat.”

Mendengar itu si-ibu makin meraung-raung menghempas-hempaskan diri sa-laku orang gila. Tatkala Batu Jenjulang itu sampai ka-langit, maka kanak-kanak itu pun hilang-lah di-dalam awang-awangan. Sa-bentar, maka Batu Jenjulang itu jatuh-lah kembali ka-bawah dan menimpa kedua orang tua (laki isteri) itu, lalu mati.

Demikian-lah, lenyap-nya riwayat dua ibu bapa yang amat kejam kepada anak-anak-nya itu.



CHERITA IV.

HARTA YANG TIDAK HALAL

Baso, ada-lah sa-buah negeri kecil, dudok-nya di-antara Bukit Tinggi dan Paya Kumbuh di-Minangkabau . Sunggoh pun negeri-nya kecil, tetapi orang-orang sangat ramai mengunjong (melawat) ka-sana, kerana di-negeri kecil itu ada sa-buah sungai yang mempunyai suatu riwayat yang ajaib.

Ayer sungai itu berkumpul dalam sa-buah kolam, di-sini di-dapati hidup beribu-ribu ekor ikan yang sangat jinak. Sungai tersebut di-namai orang Sungai Jerneh. Jikalau ada orang datang melawat-lawat ka-sungai itu, maka ikan-ikan tadi pun berkerumun-lah di-tepi-tepi kolam sambil berbunyi seperti chit....chit.

Kerap kali orang-orang yang datang ka-situ menaborkan beras ka-dalam ayer itu, dan beras ini di-makan oleh ikan-ikan tadi.

Jika ada sa-siapa yang berhaiaat atau berniat sa-suatu, maka di-sebut-nya-lah niat itu di-

tepi kolam tadi, sambil ia turun masuk ka-dalam ayer kolam dan di-chuba-nya menangkap ikan kolam itu sa-ekor. Sa-kira-nya niat itu harus akan di-kabulkan, maka dapat-lah ia menangkap ikan sa-ekor.

Menurut cherita penduduk-penduduk negeri Baso: ikan ini tidak boleh di-makan, dia juga akan turut mendapat penyakit kalau ada bahaya hawar di-negeri itu. Waktu penyakit eliachar sedang bermaharajalela berjangkit di-Minangkabau, maka ikan itu pun turut mendapat penyakit itu pula.

Dahulu ada sa-orang tua yang telah berumur kira-kira 90 tahun, tinggal di-dekat sungai itu. Dia-lah yang masih ingat dan tahu akan riwayat Sungai Jerneh itu yang sa-benar-nya.

Sekarang ikuti-lah asal kesah sungai tersebut yang di-cheritakan oleh orang tua ini:

Zaman dulu di-sabuah kampong yang berhampiran dengan Sungai Jerneh itu, tinggal sa-orang perempuan janda dengan dua orang anak-nya yang masih kanak-kanak lagi. Anak-anak itu berumur 10 dan 8 tahun, sa-orang laki-laki dan sa-orang perempuan.

Suatu hari janda dengan anak-anak-nya ini pergi mengunjongi jamuan dan keramaian besar. Anak-anak-nya itu di-beri memakai pakaian yang indah-indah mengikut adat orang-orang di-Minangkabau. Yang laki-laki bersongkok beldu warna merah bertatah dengan tabor emas, berbaju beldu yang di-tutup dangan kancing wang emas. Kain sarong-nya ia-lah kain di-tenun dari benang emas, kelihatan berkilau-kilauan.

Anak perempuan-nya pula memakai baju kurong satin hijau, berselendang kain, kalapak dari benang emas juga. Di-leher-nya tergantung rantai leher (kalong) yang berbentuk ikan, kuda, ayam dan lain-lain semua-nya di-perbuat daripada emas urai.

Demikian-lah adat atau kebiasaan orang-orang di-Minangkabau, jika mereka ada anak-anak yang hendak di-bawa ka-mana-mana pesta atau keramaian atau jamuan khenduri, maka anak-anak itu di-beri memakai pakaian atau perhiasan yang sesuai dengan kedudukan ayah bonda-nya mengikut dalam pergaulan hidup sehari-hari.

Perempuan janda itu terkenal sa-bagai sa-orang yang kaya, mempunyai sawah ladang



yang luas, kerbau, sapi yang berpuak, dan Balai A'dat yang sangat indah serta besar.

Sa-telah sampai di-tempat keramaian itu, maka ibu dan anak-anak-nya tadi dudok-lah di-tikar yang telah sedia terhampar. Mereka di-jamu dengan makan minum sa-puas-puas-nya. Sa-telah itu anak-anak di-benarkan pergi ka-halaman rumah itu melihat permainan-permainan yang telah di-adakan: saperti panchak silat, tari piring dan lain-lain. Penoh sesak halaman itu dengan kanak-kanak dan orang dewasa. Semuanya berhias dan berpakaian yang chantek-chantek. Gegak dan ramai-lah terdengar suara orang berchampur dengan suara bunyi-bunyian.

Hari pun mulai hampir senja, si-ibu tadi meminta' izin akan pulang. Sa-belum daripada itu dia hendak mengambil anak-anak-nya dahulu. Maka di-chari-nya anak-anak-nya di-tengah-tengah orang banyak itu yang sedang beransor-ansor pula berangkat ka-rumah masing-masing. Akan tetapi anak-anak yang dua orang tadi ta' ada nampak di-gelanggang permainan itu. Oleh janda itu di-chari-nya ka-sana kamari, tiada jua berjumpa.

Menurut khabar kawan-kawan-nya.

kanak-kanak yang dua beradek itu telah pulang. Sa-telah mendengar khabar ini, si-ibu pun pulanglah, akan tetapi dia merasa sangat hairan, manakala dia sampai ka-rumah di-dapati pintu rumahnya maseh terkunchi. Jiran-jiran di-sekeliling rumahnya pun belum melihat anak-anak itu pulang. Hati si-ibu mulai chemas. Di-pergi-nya pada tiap-tiap buah rumah yang berdekatan, ditanya-nya kalau-kalau mereka ada melihat anaknya itu, tetapi sa-orang pun tidak ada yang melihat.

Bedok maghrib pun telah di-palu orang, hari semakin gelap. Sahabat handai si-janda ini maseh juga menchari anak-anak yang hilang itu, mereka menyuloh ka-segala cherok kampung itu, walau pun anak-anak itu belum di-dapati jua. Si-ibu sangat sedeh dan menangis tersedu-sedu, dia merasa takut dan chemas akan nasib anak-anak-nya. Hingga larut malam orang ramai di-rumah-nya, memujok supaya dia bersabar.

Telah hari hampir siang, mata si-ibu terpejam sa-bentar, dalam masa itu dia bermimpi: sa-orang perempuan tua telah datang dan berkata kapada-nya: "Anak-anak-mu itu telah

jatoh masok ka-dalam Sungai Jerneh. Harta benda serta kekayaan-mu yang banyak ini, adalah semua-nya kau dapati dengan jalan tidak halal, hingga sekarang engkau telah mendapat suatu chubaan sebagai pelajaran. Esok pagi-pagi pergi-lah engkau ka-sungai itu, taborkan beras ka-dalam ayer dan panggil-lah anak-anak-mu.”

Sa-bentar orang tua yang berkata-kata itu pun hilang-lah (gha'ib) dari mata-nya, maka si-ibu pun tersentak jaga. Dia mencheritakan mimpi-nya itu kepada kaum kerabat dan sahabat handai-nya.

Sesudah orong-orang di-rumah itu sembahvan~~e~~ subuh, maka mereka pergi-lah ka-sungai tadi, membawa beras beberapa genggam. Sampai sahaja di-sana, beras itu pun di-taborkan, dan di-panggilkan anak-anak-nya. Sa-bentar itu jua datang-lah dua ekor ikan besar yang amat indah-indah rupa-nya, bersisek perak dan bersirek emas. Beras yang telah di-tabor tadi di-makan-nya sambil berbunyi saperti chit.... chit!

Ikan yang dua ekor ini hidup sampai 45 tahun umor-nya. Mereka-lah yang menjadi ne-

nek ikan yang beribu-ribu banyak-nya, hingga sekarang maseh ada lagi keturunan-nya di-Sungai Jerneh itu. Pada keturunan yang ketiga, hilang-lah sisek perak dan sirek emas ikan itu.

Khabar-nya, perempuan janda tadi telah bertobat, sa-bahagian daripada harta benda-nya yang tidak halal itu di-sedekahkan kapada orang-orang miskin dan melarat.

Dia telah pergi ka-Makkah (Tanah Suchi) bagi menunaikan fardzu haji dan terus tinggal tetap di-sana.

Hingga sekarang orang-orang maseh banyak datang melawat ka-Sungai Jerneh, melihat ikan yang jinak-jinak itu. Penduduk-penduduk kampung Sungei Jernih telah bersumpah: tidak akan memakan ikan-ikan yang berasal daripada manusia itu. Persumpahan tersebut belum pernah lagi di-langgar orang.

Riwayat Sungai Jerneh ini telah tersibar ka-merata-rata. di-cheritakan dari satu mulut ka-satu mulut.

JASA IBU

(K. JOTH.)

Suatu petang sa-telah aku pulang dari pejabat-ku, dudok-lah aku di-kerusi membalek-balek dan membaca akhbar Utusan Melayu keluaran hari itu, yang aku beli sa-masa perjalanan aku kembali tadi. Sambil pula ku minum teh bagi melepaskan penat lelah di-waktu kerja.

Petang itu udara sunggoh nyaman dan menyegarkan badan. Sa-telah aku dapati isi-isi berita keluaran hari itu tidak ada yang bagitu panas dan berat untok di-fikirkan maka tangan aku perlahan-lahan jatuh meletakkan akhbar itu di-atas meja di-hadapan-ku, sambil mata-ku menghala keluar menerusi jëndela yang berada di-sisi-ku, memandang kapada daun-daun kelapa yang menghijavu sedang melambai-lambai di-hembus bayu. Sunggoh subur dan ma'amor pohon-pohon kelapa yang menjadi lambang dan menghiyasi tanah aver kita ini! Sedang aku 'ashek meni'mat dan memuji-muji keindahan itu tiba-

tiba ingatan-ku kembali melayang ka-masa dahulu, masa aku di-pelihara dan di-jaga oleh ibu-ku dengan penoh kaseh mesra

Ayah-ku telah meniggal dunia sa-masa aku maseh dalam rahim (perut) ibu-ku lagi. Kematian-nya, hanya ada meniggal sadikit sabanyak harta pusaka. Pusaka dari hasil penat jereh tulang empat kerat-nya yang hálal. Dengan peninggal-nya itu dapat-lah aku hidup dengan tidak terdesak saperti kaum peminta' sedekah yang terpaksa menadah tangan memintaminta ka-sana ka-mari sa-hari-hari. Dia di-benchi, dia di-chachi oleh orang ramai. Pada hal sa-tengah-tengah-nya peminta-minta sedekah itu ada-lah dari orang yang betul-betul kesempitan hidup. Ta' ada-kah orang-orang kaya yang ingin membela nasib segala mereka yang terbiar itu?


Sekarang aku menjaga harta pusaka peninggalan ayah-ku dengan baik dan menuchari tambah lagi kapada harta yang ada itu supaya menjadi kekal banyak.

Masa Allah Yarhamah ibu-ku maseh ada: dia mendidek dan mengajar aku dengan muka yang jerneh.

Bila umur-ku meningkat enam tahun, di-hantar-nya aku belajar dalam sa-buah sekolah Melayu yang tidak berapa jauh dari kampung kami. Ibu-ku sentiasa memperingat aku supaya jangan chuai-chuai dalam segala pelajaran. Besar-lah aku dengan jagaan dan didekan ibu-ku yang sempurna dan ibu-ku yang sangat aku kasehi itu. Dalam pada itu juga dia tidak lupa menaborkan berbagai-bagai nasihat yang berguna bagi panduan hidup-ku di-masa hadapan.

Sambil menjaga harta peninggalan ayah-ku, ibu-ku membuat kueh dan di-letak-nya jual di-kedai-kedai. Dengan usaha ibu-ku bagini sehari-hari dapat-lah menambah lagi kesenangan untuk keperluan hidup dan perbelanjaan sekolah-ku. Bukan ibu-ku memandang untuk hari ini sahaja, untuk hari ini telah pun chukup; tetapi dia beringat dan bersedia untuk masa-masa yang akan datang.

Sa-kembali aku dari sekolah aku tidak pula lupa menolang dan membantu kerja-kerja ibu-ku di-rumah seperti mengambil ayer, membersih rumah tangga, menyapu halaman dan lain-lain kerja yang sesuai dengan kerja kanak-kanak seperti aku.



Di-sekolah aku selalu pula mendapat kepujian dari guru-guru dan kawan-kawan-ku. Tetapi aku ta' mahu bermegah-megah dengan segala pujian itu, aku terima dengan tenang dan sa-balek-nya ku-jadikan segala puji-pujian itu sa-bagai perangsang untok aku belajar lebeh giat lagi terus minerus.

Menurut keterangan dan cherita dari mulut orang tua-tua yang berhampiran dengan kampung-ku bahawa ibu-ku di-masa kechil-nya sangat-lah rajin belajar: baik dalam pelajaran Melayu dan agama.

Bukti-nya, waktu malam: masa itu agak lapang segala kerja ibu-ku, dia selalu menunjok ajar pada-ku sama ada dalam pelajaran sekolah-ku (pelajaran Melayu) dan pelajaran agama Islam yang wajib di-ketahui dan di-pelajari oleh tiap-tiap orang yang mengaku diri-nya beragama Islam yang maha suchi.

Beberapa tahun kemudian, kerana kuat ajaran dan usaha tabah-ku dalam pelajaran maka aku pun tammat-lah dalam pengajian Melayu sa-takat darjah lima. Sekolah di-daerah kampung-ku ini hanya darjah lima-lah yang sa-

habis tinggi, ta' ada darjah lain yang lebeh tinggi untok meningkat. Oleh sabab umur-ku masih muda, che' gu aku telah mengeshor-kan kapada aku supaya mengambil peluang masok peperiksaan pilihan untok melanjutkan pelajaran ka-sekolah Inggeris ia-itu dengan perbelanjaan bantuan Kerajaan. Sa-telah aku mendapat persetujuan dari ibu-ku, aku pun masok-lah peperiksaan tersebut. Akhir-nya lepas sa-minggu aku telah menerima keputusan dari guru-ku bahawa yang aku dapat masok belajar ka-sekolah Inggeris. Alang-kah riang hati ibu dan aku bila mendengar perkhabaran itu! Aku pun masok-lah belajar di-sekolah yang di-tetapkan oleh Kerajaan itu.

Bagaimana aku di-sekolah Melaya dahulu, bagitu-lah jua sa-masa aku di-sekolah Inggeris, ibu-ku tidak jemu-jemu memberi kata-kata nasehat pada-ku, semua nasehat itu aku tetap terima dan sematkan dalam hati-ku hingga ka-masa ini untok jadi pedoman ka-masa akan datang.

Satu lagi yang ta' dapat ku-lupa ia-lah pada suatu masa: ketika aku sedang di-hinggapi penyakit demam panas, amboi bukan main lagi kuat-nya sakit-ku itu! Sa-telah di-periksa oleh

tabib (dokter); ibu-ku menjaga dan memberi makan ubat pada-ku dengan tidak melupakan waktu-nya. Dia sentiasa berada di-samping-ku sa-hari-hari merawat aku dengan bermacam-macam kepayahan. Kadang-kadang meleleh ayer mata-nya bila mengenangkan kerunsingan tersebut.....

Sa-telah beberapa tahun berselang, dengan berkat do'a ibu-ku aku pun tammat-lah dalam Ujian Sekolah Inggeris-ku yang paling akhir sa-kali, sa-telah melalui dan menchapai kelulusan dalam tiap-tiap kali pepereksaan.

Sekarang aku telah dapat menjawat jawatan kerani dalam Pejabat Pelajaran di-bandar-ku, ia-itu hasil dari jasa didekan ibu-ku yang ku-chintai. Tetapi apakan daya! 'Ta' sempat lama aku hendak membalas segala keperahan dan jasa ibu-ku terhadap-ku sa-lama itu, oleh kerana dia telah pergi menyahut seruan Tuhan kembali ka-Rahmattullah, sa-lepas lebeh kurang tiga bulan daripada aku mulai menjawat jawatan kerani

itu. Aku ta'dapat kata apa-apa atas kehilangan ibu-ku dengan tiba-tiba itu sa-telah dia mengidapi demam panas yang terok sa-lama tiga hari.

Walaupun aku ta' sempat hendak membalas jasa-jasa-nya yang ta' ternilai itu tetapi aku sentiasa membacha ayat-ayat suci dari Al-Que'an pada tiap-tiap malam Jumaat moga-moga Tuhan limpahkan rahmat ka-atas roh ibu-ku yang mulia juga bapa-ku yang sama-sama mereka bersemadi di-bumi Allah.

TAMMAT
